




0 10 20 30 40 50 60 70 80 90 100 110 120 130 140 150 160 170 180

Inches
1
2
3
4
5
6
7
8
9
10
11
12

Centimetres
1
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31

Kodak Color Control Patches





韓文類譜卷第七

韓子年譜

起元和十四年
止長慶四年

丹陽洪

興祖慶善

十四年己亥春貶潮州刺史冬移袁州

元日酬蔡州馬尚書去年蔡州元日見寄之

什云元日新詩已去年當在今春也 舊史

云鳳翔法門寺有釋迦指骨一節是年正月

丁亥上令中使押宮人持香花迎佛骨留禁

中三日乃送諸寺王公士庶奔走捨施唯恐

在後百姓有廢業破產燒頂灼臂而求供養



者愈上疏極陳其弊癸巳貶潮州刺史宰相
疑馮宿草疏出宿爲歙州刺史時宰相皇甫
鎔程昇也公之被謫即日上道便道取疾以
至海上初以二月二日過宜城見宜城驛記
三月二十五日至潮州謝上表云蒙恩除潮
州刺史即日奔馳上道經涉嶺海水陸萬里
以今月二十五日到州上訖 瀧吏詩云南
行逾六旬始下昌樂瀧又云下此三千里有
州始名潮公以正月十四日去國行逾六旬
三月幾望矣遂以二十五日至潮則是十許

日行三千里蓋瀧水湍急故也瀧音雙歐陽
文忠公云韶州圖經樂昌縣西一百八十里
武溪驚湍激石流數百里按武水 sources 出郴州
臨武其俗謂水湍峻爲瀧劉仲章者前爲樂
昌令余初以韓集云昌樂瀧疑其誤乃改從
樂昌仲章云不然縣名樂昌而瀧名昌樂其
舊俗所傳如此韓集不誤也謝表又云年纔
五十時年五十二 四月十六日有送毛仙
翁序二十四日有祭鱷魚文 公初貶潮至
藍關有詩云雲橫秦嶺家何在次鄧州界有

詩云戀闕那堪又憶家蓋公乘驛之官與家人別於京師其後家亦譴逐及公於南方故過始興江口感懷云憶作兒童隨伯氏南來今祇一身存目前百口還相逐舊事無人可共論初公隨兄南遷于韶兄卒北歸與百口避地江南至今三十餘年往時百口獨公存耳公在潮州有謝孔大夫狀云伏奉七月二十七日牒以某貶授刺史特加優禮以州小俸薄慮有闕乏每月別給錢五十千以送使錢充者開緘捧讀驚榮交至顧已量分慚

懼益深欲致辭為讓則乖伏屬之禮承命苟貪又非循省之道進退反側無以自寧某妻子男女并孤遺孫姪奴婢等尚未到官窮州使賓罕至身衣口食絹米足充過此以往實無所用積之於室非廉者所為受之於官名且不正恃蒙眷待輒此披陳此狀集中無之孔幾十二年秋自國子祭酒拜御史大夫廣州刺史嶺南節度孔大夫即幾也

按公過始興江口詩云目前百口還相逐而此狀蓋八月間所作却云某妻子

男女并孤遺孫姪奴婢等尚未到官不知何以又女孥壙銘謂愈旣行有司以罪人家不可留京師迫遣之女孥道死於商南蓋二月二日也不應八月猶未至潮此狀不見本集不知洪何所本也潮州請置鄉校牒云趙德秀才即叙退之文章七十二篇爲文錄者公有別趙子詩德自謂行道學文庶幾乎古不肯從公于袁而區弘自連山從公于荆又從公于京師各從其志也 袁州謝表云先朝恕臣愚直不加大

罪自刑部侍郎貶潮州刺史伏遇其年七月十三日恩赦至其年十月二十四日準例量移改授袁州刺史是年七月己丑羣臣上尊號曰元和聖文神武法天應道皇帝御宣政樓受冊禮畢御丹鳳樓大赦天下己丑七月十三日也實錄云十月己巳韓愈袁州刺史己巳十月二十四日也 公在潮有賀冊尊號表

十五年庚子秋召爲國子祭酒

是年閏正月穆宗即位袁州謝上表云臣以

去年正月貶授潮州刺史其年十月移授袁州以今月八日到任曲江留別張韶州云來往再逢梅柳春知公去春到潮今春到袁也是春有賀穆宗即位賀赦賀冊皇太后賀慶雲四表舉韓泰自代狀 滕王閣記云十五年十月袁州刺史祭湘君夫人云十五年十月朝散大夫守國子祭酒按唐史云九月辛酉袁州刺史韓愈國子祭酒蓋命下在九月受命在十月是月爲滕王閣記時猶未受祭酒之命也 祭湘君夫人云前歲之春黜守

潮陽去潮即袁今又獲位於朝凡三年於今自十四年春至今年十月纔二年耳又云復其章綬者公爲行軍司馬時賜金紫今爲祭酒復其舊也

湘夫人祭文刻於黃陵廟碑陰今在湘陰縣北八十里趙德父云碑四面皆有字今其兩面字多處已磨滅不可讀德父嘗得七八十年前本字好可寶今所謂凡三年者實祚凡三十年然趙德父之疑亦如洪之疑也余按公文云退思

往昔實發夢寐凡三十年於今乃合公
蓋記疇昔之夢耳非謂自貶所歸朝也
其義甚明況於今亦不為斷句余嘗疑
公以剛正自許而乃若眷眷於一黃陵
廟以私錢十萬新其廟宇又為文以祭
之勻石以銘之意其必有所感召今乃
得於祭文洪不細考耳樊本載石本又
作累年蓋字益磨滅從而意之耳

次石頭驛寄江西王十中丞閣老云憑高試
回首一望豫章城王仲舒自中書舍人除御

史中丞觀察江西公北歸寄詩別之 至江
州寄鄂岳李大夫云故人辭禮闈旌節鎮江
圻李程自禮部侍郎觀察鄂岳又云別來已
三歲蓋程十三年出鎮與公別於京師今三
歲矣又云年皆過半百時公年五十三又云
公其務貫過我亦請改事然則二公嘗以事
相失也 題西林寺故蕭二郎中舊堂注云
公有女為尼在江州詩云中郎有女能傳業
伯道無兒可保家偶到匡山曾住處幾行衰
淚落烟霞一云今日匡山過舊隱空將衰淚

對烟霞因話錄云蕭穎士子存字伯誠為金部員外郎惡裴延齡之為人弃官歸廬山以山水自娛終于檢校倉部郎中公少時嘗受金部賞知及自袁州入為祭酒途經江州因遊廬山過金部山居訪知諸子凋謝唯二女在焉因賦此詩留百縑以拯之行次安陸先寄隨州周員外云行行指漢東暫喜笑言同雨雪離江上蒹葭出夢中隨州一作循一作徐皆誤舊本蓋曰周隨州循循其名也夢中夢澤也

周員外乃周君巢也諸本無有名循者公再寄周詩云陸孟丘楊久作塵同時存者更誰人金丹別後知傳得乞取刀圭救病身公與君巢同為董晉幕客陸長源孟叔度丘穎楊凝皆一時同幕之舊至是皆歿矣君巢晚留意丹藥柳子厚嘗有荅周君巢論餌藥久壽書故公有末章之語其為周君巢無疑矣洪為或本所誤耳

南海神廟碑云元和十二年詔用魯國孔公

爲廣州刺史又云至州之明年即十三年明
年祀歸即十四年明年其時公又固往即十
五年幾墓誌云祠部歲下廣州祭南海廟廟
入海口爲州者皆憚之不自奉事唯公歲自
常行官吏刻石爲詞美之十五年遷吏部侍
郎而舊史云幾每受詔自犯風波而往愈在
潮州作詩美之按十五年退之已移袁州舊
史誤也

公在潮州孔幾待公特厚舊史所謂作
詩美之蓋南海廟碑也碑云願刻廟石

以著厥美而繫之以詩故也碑立在元
和十五年十月時公亦已去袁矣然公
誌孔幾墓云官吏刻石爲詞美之是立
碑之日公亦不應尚稱官吏也蓋墓誌
與傳皆推本而言之也

與孟簡書云行官自南回過吉州得手書簡
十五年春貶吉州司馬也又云潮州時有一
老僧號大顛頗聰明識道理遠地無可與語
者故自山召至州郭留數十日及祭神海上
遂造其廬及來袁州留衣服爲別乃人之情

非崇信其法求福田利益也東坡云退之喜
大顛如喜文暢澄觀之意而世妄撰退之與
顛書其詞凡鄙有一士人又於其末題云歐
陽永叔謂此文非退之莫能及此又誣永叔
也近世所傳退之別傳載公與大顛往復之
語深詆退之其言多近世經義之說又於其
末作永叔跋云使退之復生不能自解免吾
友吳源明云徐君平見介甫不喜退之故作
此文耳

公與大顛手簡三刻石在潮州靈山院

慶曆中袁世弼得其墨本疑之以質歐
公歐公云實退之語佗意不及也手簡
上二簡皆招速常語耳第三簡最後云
愈聞道無凝滯行止繫縛苟非所戀著
則山林閑寂與城隍無異大顛師論甚
宏博而必守山林不至州郭自激修行
立空曠無累之地者非通道也勞於一
來安于所識道故如是故歐公謂其以
繫辭爲大傳謂著山林與著城郭無異
謂宜爲退之言者此也近世妄撰公別

傳以爲孟簡所纂純載公與大顛荅問
佛法語故世儒與前簡併廢之然公上
三手簡固無它語也以孟簡書質之公
固嘗邀之至州郭也歐公跋語見於集
古錄豈洪亦未之考耶王介甫嘗有送
呂潮州詩云不必移鱷魚詭怪以疑民
有若大顛者高材能動人亦勿與爲禮
聽之汨彞倫故一時黨同者爲此傳源
明之言不妄也

論黃家賊事宜狀云去年貶嶺外刺史謂在

潮時黃家賊即柳子厚所稱邕管黃少卿等
也論典貼良人家男女狀云臣往任袁州
刺史此狀在還朝之後袁人以男女爲隸過
期不贖則没入之愈至悉計傭得贖所沒歸
之父母七百餘人又論夷獠請因改元大慶
遣使宣諭仍擇經略使撫之是年有柳子
厚姪孫滂祭文墓誌曾直云退之自潮州還
朝後文不煩繩削而自合

志道云不知者傳愈稍信奉佛氏簡素事

佛以書贊之愈荅書以辨

穆宗長慶元年辛丑秋遷兵部侍郎

公去冬之末道出漢東今春方至京師公有詩云竄逐三年海上歸自十四年謫潮至今春到闕首尾三年矣

按黃家賊事宜狀及典貼良人男女狀二狀皆云乞因改元大慶而行之是在未慶霈之前有此狀也故洪載二狀於去年冬而此却云今春方到闕何也按黃家賊事宜狀謂臣去年貶嶺外刺史又典貼良人男女狀謂臣往任袁州刺

史謂之去年蓋元和十四年也則是公十五年冬已到闕豈不明甚若謂今春到闕則不應預有此二狀也公長慶二年再見裴晉公於鎮州行營所謂竄逐三年海上歸逢公復此著征衣者蓋記相別之日兼竄逐而言也非必謂竄逐實經三年也况公初除祭酒實去歲九月二十二日亦不應一冬在道理無可疑

李翱云公入遷祭酒有直講能說禮而陋容

學官多豪族子擯之不得共食公命吏曰召直講來與祭酒共食學官由此不敢賤直講奏儒生為學官日使會講生徒奔走聽聞皆相喜曰韓公來為祭酒國子監不寂寞矣公在國子有舉張惟素自代狀論新注學官牒薦張籍狀請上尊號表云坐收冀部旋定幽都冀王承元幽劉總也張籍祭公詩云我官麟臺中公為大司成念此委末秩不能力自揚特狀為博士始獲升朝行時籍自校書郎為國子博士公為祭酒雨中寄籍詩云

歲晚偏蕭索誰當救晉饑籍荅云聞道韓夫子還同此寂寥公誘厲後進館之者十六七雖晨炊不給怡然不介意族姻友舊不自立者必待我然後衣食嫁娶喪葬而公自幼至老家入常百口宜其貧也唐史云秋七月庚申國子祭酒韓愈為兵部侍郎公為兵部有舉韋顓自代狀是年有李邕祭文墓誌鄭羣薛戎墓誌

志道云公牒吏部國子監學官非通經博涉及進士五經諸色登科人勿擬新官上

日必加研試然後放上

二年壬寅春奉使鎮州秋遷吏部侍郎

元年七月壬戌鎮州亂殺田弘正立王延湊
命深州刺史牛元翼節度深冀以討之十月
丙寅命裴度爲鎮州四面行營都招討使戊
辰元翼爲延湊所圍二年春二月甲子赦延
湊詔愈宣撫衆皆危之愈旣至諭以逆順辭
情切至延湊畏重之語在本傳李翱曰朝廷
以延湊爲節度使詔公往宣撫歸而牛元翼
果出及還於上前奏與延湊及三軍語上大

悅曰卿直向伊如此道由是有意大用授吏
部侍郎公使鎮州次壽陽驛詩云風光欲動
別長安春半邊城特地寒鎮州初歸詩云還
有小園桃李在留花不發待郎歸公以二月
初使鎮州二月望次壽陽驛比還春末矣壽
陽太原之東邑也時裴度屯承天行營有酬
裴司空詩云竄逐三年海上歸逢公復此著
征衣蓋公嘗從度討蔡今復使延湊也又鎮
州路上酬裴重見寄詩云銜命山東撫亂師
日馳三百自嫌遲公奉使往返纔兩月者以

此舊史云度受命之日蒐兵補卒自董西師
臨於賊境屢以捷聞進位檢校司空也 開
州韋侍講盛山十二詩序云韋侯昔以考功
副郎守盛山處厚以元和十一年九月自考
功爲開州刺史也又云及此年韋侯爲中書
舍人侍講六經禁中處厚以元和十五年三
月壬子以侍講學士講詩關雎書洪範于太
液亭今年夏四月爲中書舍人也 論變鹽
法事宜狀舊史云二年三月張平叔爲戶部
侍郎上疏請官自賣鹽可以富國強兵陳利

害十八條詔下其疏令公卿詳議中書舍人
韋處厚隨條詰難事遂不行司馬溫公云愈
時奉使鎮州未還狀云奉今月九日勅不知
其何月也今附於四月之末 穆宗實錄云
二年九月庚寅兵部侍郎韓愈爲吏部侍郎
公行狀云凡令史皆不鎖聽出入或問公公
曰人所畏鬼者以其不能見也鬼如可見則
人不畏矣選人不得見令史故令史勢重聽
其出入故勢輕 鄆州谿堂詩後曰長慶二
年十月建序曰憲宗十四年馬公爲節度觀

察使上即位之二年召公入穆宗以元和十五年即位即位之二年長慶元年也上之三年公爲政於鄆曹濮適四年矣正在今年是年有竇司業祭文墓誌楚國夫人墓誌黃陵廟碑

按趙德父金石錄黃陵廟碑實在長慶元年又碑云長慶元年刺史張愉自京師往余謂曰白我一碑石載二妃事愉旣至州曰碑謹具遂篆其事則固不應在二年也

三年癸卯夏爲京兆尹兼御史大夫冬復爲兵部侍郎又遷吏部侍郎

實錄云三年六月辛卯吏部侍郎韓愈京兆尹兼御史大夫勅放臺參後不得爲例時宰相李逢吉與李紳不協及紳爲中丞乃除愈京兆尹兼御史大夫仍放臺參紳性峭直屢上疏論其事遂與愈辭理往復逢吉乃兩罷之出紳爲江西觀察使以公爲兵部侍郎荅友人論京兆尹不臺參書云容桂觀察使帶中丞尚不臺參京尹郡國之首所管神州赤

縣官帶大夫豈得却不如事須臺叅亦是何典故赤令尚與中丞分道而行何況京尹聖恩以為然便令宣與李紳不用臺叅今本顛倒不可讀當從唐本也 李翱云改京兆尹六軍將士皆不敢犯私相言曰是尚欲燒佛骨者安可忤故盜賊止遇旱米價不敢上實錄云十月癸巳愈為兵部侍郎庚子為吏部侍郎 公為京兆有舉馬摠自代狀賀雨賀太陽不虧表祭竹林神曲江祭龍文 再為兵部有舉張正甫自代狀 羅池廟碑云

尚書吏部侍郎韓愈撰長慶元年正月建按長慶元年正月公尚為祭酒二年九月始為吏部歐陽公云據建碑時公未為吏部碑云柳侯死後三年廟成明年愈為柳人書羅池事子厚以元和十四年卒至後二年愈作碑時當是長慶三年其云元年蓋傳摹者誤刻之耳 是年有送鄭權尚書序并詩祭馬摠張徹女孥文并女孥墓誌韓弘碑李干墓誌論孔幾致仕狀

按公祭馬摠文時為吏部侍郎也公尹

京兆自吏部遷嘗舉揔自代是舉代之
日揔固亡恙不應祭文具前階也然祭
文實云賀問未歸吊廬已萃未燕于堂
已哭于次蓋揔方詔歸而遽卒時公除
京兆猶未拜告命故也恐重學者之疑
故詳及之

四年甲辰冬退之沒年五十七贈禮部尚書謚
曰文

是年正月敬宗即位 二月有王仲舒碑一
本云公諱弘中字某司馬公云實錄新舊傳

皆名仲舒字弘中又宴喜亭記稱王弘中則
弘中必字也仲舒貞元十年登賢良方正科
碑云貞元初射策拜左拾遺墓誌云貞元十
年按陸贄之貶在十一年春而陽城傳云裴
延齡讒毀陸贄等坐貶黜城率拾遺王仲舒
數人守延英上疏則墓誌云十年是矣 四
月張徹墓誌云其妻子以君之喪葬於某州
某所而祭文云無所掩葬輿窆東歸者徹初
被殺招窆而歸其後故人以幣請之范陽始
得歸葬也

按洪載張徹墓誌於今年載祭文於去年質之舊本墓誌實長慶三年祭文則當在元年也洪兩皆失之徹墓誌云其友侯雲長佐鄆使請於其帥馬僕射為之選於軍中得故與君相知張孝恭元實者使以幣請之范陽范陽人義而歸之馬僕射馬總也總以長慶二年秋遷右僕射踰年之夏則召還矣徹死於長慶元年秋朱克融之變踰年則定固不應四年而後歸葬也舊本為是又公祭

徹之日實為兵部侍郎也其文云無所掩葬輿輿東歸蓋聞訃之始也公為兵部實在元年而徹以元年七月死蓋祭徹在是年之秋冬無疑矣併考正之以俟知者

八月有孔戮墓誌 公行狀云正議大夫行尚書吏部侍郎上柱國韓公四年疾病滿百日罷以十二月卒於靖安里第載公屬纊語曰愈伯兄德行高曉方藥食必視本草年止於四十二愈踈愚食不擇禁忌位為侍郎年

出伯兄十五歲如又不足於何而足且獲終
於牖下幸不至失節以下見先人可謂榮矣
明年張籍祭公詩云去夏公請告養疾城南
莊籍時官休罷兩月同游翔皇子陂岸西地
曠氣色清新池平四漲中有蒲荇香北臺臨
稻疇茂柳多陰涼板亭坐垂釣煩苦稍已平
共愛池上佳聯句舒遐情會有賈秀士來茲
亦間并移船入南溪東西縱篙根盤回入潭
瀨下網截鯉魴踏沙掇小蔬樹下丞新粳日
來相與嬉不知暑景長月中登高灘星漢交

垂芒釣車擲長線有獲齊驪驚夜闌乘馬歸
衣上草露光公為遊溪詩唱詠多慨慷自期
此終老結社於其鄉城南莊在長安城南公
之別墅也池上聯句集中無之游溪詩即南
溪始泛三首是也魯直於退之最愛此詩以
為有詩人句律之深意蓋退之絕筆於此賈
秀士即島島有韓侍郎夜泛南溪詩又云籍
受新官誥拜恩當入城公亦同歸還居處隔
一坊籍長慶初為國子博士二年為水部今
秋為國子司業也又曰公有曠達識生死為

一網及當臨終晨意色亦不荒贈我珍重言
傲然委衾裳其於死生之際如此東坡云歐
陽永叔司馬君實范景仁皆不喜佛然其聰
明之所照了德力之所成就真佛法也愚於
退之亦云皇甫湜云先生洞朗軒闢不施
戟級平居雖寢食未嘗去書怠以爲枕食以
飴口未嘗一日不對客閨人或晝見其面退
相指語以爲異事行狀云氣厚性通議論
多大體與人交終始不易凡嫁內外及交友
之女無主者十人幼養於嫂鄭氏及嫂歿爲

之菴服以報之舊史云少時與洛陽孟郊
東郡張籍友善名位未振愈不避寒暑稱薦
於公卿間而籍終成科第榮於祿仕後雖通
貴每退公之際則相與談讌論文賦詩如平
昔觀諸權門豪士如僕隸焉瞪然不顧大抵
以興起名教獎仁義爲事新史不詳著其語
今附于此然舊史旣云性弘通又云性褊僻
不若新史云性明銳不詭隨爲得其實也
舊史又云愈時恃才肆意南人妄以柳宗元
爲羅池神而愈碑以實之李賀父名晉愈爲

賀作諱辨令舉進士以此非愈按羅池事理
或有之未必柳人之妄也劇談錄云元和中
李賀善爲歌篇韓公深所知重於搢紳間每
加延譽由是聲華籍甚時元稹年少以明經
擢第常願交結賀一日執贄造門賀覽刺令
僕者謂曰明經及第何事來看李賀稹慙憤
而退其後稹制策登科日當要路及爲禮部
郎中因議賀父諱晉肅不合應進士舉文公
惜其才爲著諱辨以明之撫言亦云賀舉進
士或謗賀不避家諱文公特著諱辨一篇然

則賀嘗舉進士而元稹謗之也諱辨亦云賀
舉進士有名而唐史本傳云父名晉肅以是
不應進士愈爲作諱辨竟不就試非也退之
勸賀舉進士蓋惜其才耳何恃才肆意之有

孫伯野跋洪慶善年譜

右洪慶善所次昌黎年譜宣和壬寅夏得
於其叔成季觀其推次之工決知其學非
苟然者獨淮西事宜狀有可疑者按通鑑
元和九年閏八月丙辰少陽薨其子元濟
匿喪以病聞自領軍務九月元濟不迎弔

祭使發兵四出屠舞陽焚葉襄城十年春
正月縱兵侵掠及於東畿己亥制削元濟
官爵命宣武等十六道兵進討其後師久
未有功五月上遣中丞裴度詣行營察用
兵形勢度還言淮西必可取之狀考功郎
中知制誥韓愈上言謂克淮西在陛下斷
與不斷則是裴度察形勢還後退之方有
事宜狀狀中云去年春夏已來蓋謂少陽
未死前爾恐宜從通鑑六月九日孫傳伯
野父題

洪慶善年譜後記

僕初作昌黎年譜叙淮西事宜狀在元和
九年孫公伯野辨其非是乙巳歲再加考
正而增廣之興祖記

韓文類譜卷第七

籙正云西八四水珍
瓊山館依宋本校刊

柳先生年譜

柳氏之先自黃帝歷周魯孝公子夷伯展孫無
駭生禽為魯士師謚曰惠食采于柳下遂姓柳
氏楚滅魯仕楚秦并天下柳氏遷於河東秦末
柳下惠裔孫安始居解縣安孫隗漢齊相六世
孫豐後漢光祿勳六世孫軌晉吏部尚書生景
猷晉侍中二子耆純耆號西卷純號東卷耆汝南太守二
子恭璩恭後魏河東郡守南徙汝潁遂仕江表
曾孫緝宋州別駕宋安郡守生僧習與豫州刺
史裴叔業據州歸于後魏為揚州大中正尚書

右丞方輿公五子驚慶虬檜驚慶後魏侍中左

僕射平齊公於子厚為三子機旦肅旦隋黃門

侍郎新城男於子厚為五子燮則綽楷亨則隋

左衛騎曹參軍生奭唐中書令新唐史宰相世

燕而列傳則云字子邵按子厚有先侍御史府

君神道表云曾伯祖諱奭字子燕則當以世系

表為正然奭於侍御史為曾伯祖則於子厚墓誌

高伯祖矣而新史子厚傳及韓退之子厚墓誌

皆云曾伯祖奭恐誤楷隋濟房蘭鄆四州刺史於子厚

三子融子敬子夏子夏徐州長史為高祖

子夏 徐州長史 從心 回

因 固

從裕 某

臨邛今子 厚有士姑 陳氏墓誌 云考諱某 為臨邛今 是也

某 曹郎

旌德尉子厚有 伯祖妣李氏墓 誌云夫人生男 一人諱某不幸 終於宣州旌德 尉新史云旌德 今恐誤

子厚有伯 祖妣李氏 墓誌云有 孫二人長 曰曹郎

察躬

湖州德清
令子厚有
讓監察御
史狀云臣
祖名察躬
是也

鎮

侍御史

其

朔方營田副使
殿中侍御史集
有墓版文

纁

華陰主簿集有
叔父祭六伯母文

綜

續

宗元

子厚之從兄弟
見於集者有宗
一宗玄宗直等
世系不可得而
詳

告

字用益退之
墓誌云子厚
有子男二人
長曰周六始
四歲季曰周
七子厚卒乃
生但不知所
謂告者為誰
也

曹婆

集有叔妣陸氏
遷祔誌云夫人
生男一人曰曹
婆

皆見叔父墓版文

大曆八年癸丑

子厚生代宗之十一年也

大曆十一年丙辰

集有先太夫人盧氏歸祔誌云宗元始四歲
居京城西田廬中先君在吳家無書太夫人
教古賦十四首皆諷傳之即此年也

貞元元年乙丑

按唐本紀德宗興元元年二月甲子李懷光
反貞元元年八月甲戌伏誅是年有為崔中
丞賀平李懷光表劉夢得作集序云子厚始

以童子有奇名於貞元初

貞元五年己巳

與楊誨之書云吾年十七求進士即此年也
有爲文武百官請復尊號表三首

貞元六年庚午

是年有與權補闕書注云時年十八爲文武
百官請復尊號表三首又大會議表二首並
見外集

貞元八年壬申

是年貢于京師有送苑論詩序云八年冬余

與馬邑苑言揚聯貢于京師是歲小司徒顧
公守春官之缺而權擇士之柄明年春同趨
權衡之下並就重輕之試二月丙子有司題
甲乙之科揭于南宮余與兄又聯登焉

貞元九年癸酉

是年登進士第集有先侍御史府君神道表
云貞元九年宗元得進士第上問有司曰得
無以朝士子冒進者乎有司以聞上曰是故
抗姦臣竇參者邪吾知其不爲子求舉矣是
年有送苑論詩序

貞元十二年丙子

按唐史言宗元少精敏絕倫爲文章卓偉精緻一時輩行推仰第進士博學宏辭科授校書郎調藍田尉其與楊誨之書云吾年二十四求博學宏辭即貞元十二年也是歲有終南山祠堂碑太白山祠堂碑邠寧進奏院記與大理崔少卿啓叔父殿中侍御史墓版文殿中侍御史柳公墓表叔妣陸氏夫人遷祔誌萬年縣丞柳君墓誌監察御史周君墓表

貞元十四年戊寅

與楊誨之書云二十四求博學宏辭二年乃得仕蓋此年也

貞元十五年己卯

是年有柳常侍行狀亡妻弘農楊氏誌國子司業陽城遺愛碣與太學諸生書書之首云二十六日集賢殿正字柳宗元則子厚是時蓋在書府也有辯侵伐論注云在集賢院爲徵天下兵討淮西作

貞元十六年庚辰

是年有賀嘉瓜白兔等表溫縣王簿韓君墓

誌伯祖妣李夫人墓誌亡姊裴氏夫人墓誌
貞元十七年辛巳

是年有南岳雲峯寺和尚碑叔父祭六伯母
文亡姑陳氏夫人墓誌

貞元十八年壬午

是年有武功縣丞壁記塾屋縣新食堂記京
兆府請復尊號表三首爲耆老等請復尊號
表爲京畿父老上宰相狀爲京畿父老上尹
狀亡友校書郎獨孤君墓誌

貞元十九年癸未

是年爲監察御史裏行劉夢得集序云十有
九年爲材御史是也有讓監察御史狀褚說
朝日說爲李京兆祭楊郎中文兵部楊君墓
碣弘農令柳府君墳前石表送文暢上人序
貞元二十年甲申

是年有監祭使壁記南嶽般舟和尚第二碑
祭李中丞文尚書戶部郎中魏府君墓誌

永貞元年乙酉

順宗以貞元二十一年正月丙申即位三月
癸巳立廣陵郡王爲皇太子有賀立皇太子

表八月庚子立皇太子爲皇帝自稱太上皇
有百寮賀表辛丑改元永貞有賀改元赦表
乙巳憲宗即位有即位禮畢賀表賀冊太上
皇后及禮畢表請聽政表三首是年入尚書
爲禮部員外郎與蕭俛書云僕當時年三十
三甚少自御史裏行得禮部員外超取顯美
欲免世之求進者恠怒媚嫉其可得乎蓋是
年子厚年三十三也以王叔文黨貶邵州刺
史又貶永州司馬有陳給事行狀戶部侍郎
王公太夫人劉氏墓誌潞州兵曹柳君墓誌

元和元年丙戌

正月丁卯大赦改元有賀改元赦表劔門銘
嚴東川啓先侍御史府君神道表東明張先
生墓誌陸文通先生墓表連州司馬凌君權
厝誌哭連州凌司馬詩

元和二年丁亥

有懲咎賦送趙大秀才往江陵序先太夫人
盧氏歸祔誌

元和三年戊子

有貞符非國語與呂道州書與王參元書答

吳武陵書同吳秀才贈李睦州詩序貞符序
言臣所貶州有流人吳武陵爲臣言董仲舒
對三代受命之符而元和四年有與楊京兆
書云去年吳武陵來美其齒少才氣壯健可
以興西漢之文章則吳武陵之來永州蓋在
是年也有龍安海禪師碑凌君墓後誌送婁
圖南遊淮南序酬婁秀才早秋月夜病中見
寄酬婁秀才將之淮南見贈之作遊南亭夜
還敘志七十韻特進南公睢陽廟碑
元和四年己丑

是年子厚年三十七在永州有與裴墳蕭俛
李建楊京兆許京兆等書與蕭書云人生少
得六七十者今已三十七矣與李書云前過
三十七年與瞬息無異又云裴應叔蕭思謙
各有書足下求取觀之應叔墳也思謙俛也
與楊京兆書云永州多火災五年之間四爲
大火所迫答許京兆書云伏念得罪來五年
未嘗有故舊肯以書見及者則子厚自永貞
元年貶至是五年也又有爲南承嗣請從軍
狀送南涪州量移澧州序送內弟盧遵遊桂

州序寄桂州李中丞薦盧遵啓新作法華寺
西亭記始得西山燕遊記鈷鉏潭記鈷鉏西
小丘記丘西小石潭記小姪女子墓塋記

元和五年庚寅

是年有與揚州李相公第二啓與楊誨之書
說車贈楊誨之送從弟謀序讀韓愈所作毛
穎傳後題太府李卿外婦馬淑誌趙秀才羣
墓誌下殤女子墓塋記聞籍田有感詩

元和六年辛卯

有上西川武相公啓再與楊誨之書爲柳公

綽謝上表祭呂化光文衡州刺史東平呂君
誄試大理評事柳君墓誌同劉二十八哭呂

衡州詩

元和七年壬辰

有賀皇太子牋上嶺南鄭相公啓弘農公左
官三歲復爲大僚獻詩五十韻送崔策序武
岡銘袁家渴記石渠記石澗記小石城山記
永州刺史崔君權厝誌祭崔使君文

元和八年癸巳

有逐畢方文黃溪記鐵鑪步志答韋中立書

呂侍御墓誌祭呂敬叔文

元和九年甲午

有囚山賦起廢答段太尉逸事狀與韓愈書
上河陽烏尚書啓斥鼻亭神記文宣王道州
廟碑南岳大明寺律和尚碑湘源二妃廟碑
處士段弘古墓誌詔追赴都迴寄零陵親故
詩過衡山見新花開却寄弟詩汨羅遇風詩
北還登漢陽北原題臨川驛詩界圍巖水簾
詩戲贈詔追南來諸賓詩

元和十年乙未

有詔追赴都二月至灞亭上詩云十一年前
南渡客四千里外北歸人又酬竇貞外見促
行騎詩云投荒垂一紀新詔下荆扉蓋子厚
之貶至是十一年也退之墓誌云元和中嘗
例召至京師又皆出爲刺史而子厚得柳州
有衡陽與夢得分路贈別詩重別夢得詩三
贈詩再上湘江詩其贈別詩云十年顛顛到
秦京誰料翻爲嶺外行而夢得酬贈詩云去
國十年同赴召渡湘千里又分歧重臨事異
黃丞相三黜名慚柳士師蓋夢得初貶連州

後赴召例授播州子厚以播地遠夢得親老
欲拜疏以柳易播會大臣亦有爲夢得言者
遂改授連州故詩有重臨之語子厚以是年
三月徙柳州六月到任有柳州謝上表柳州
舉自代狀柳州上中書門下狀雷塘禱雨文
萬石亭記記柳州山水近治可遊者志從父
弟宗直殯祭弟宗直文先聖文宣王柳州廟
碑大鑿禪師碑大鑿者佛氏之第六祖也東
坡居士云柳子厚南遷始究佛法作曹溪南
嶽諸碑妙絕古今長老重辨師儒釋兼通道

學純備以謂自唐至今頌述祖師者多矣未
有通亮簡正如子厚者唐史元和中馬摠自
虔州刺史遷安南都護徙桂管經略觀察使
以碑考之蓋自安南遷南海非桂管也可以
正唐史之誤

元和十一年丙申

有井銘祭井文寄韋珩詩別舍弟宗一詩韓
漳州書報澈上人亡因寄詩聞澈上人亡寄
楊侍郎丈詩按劉夢得靈澈集序云元和十
一年終于宣州開元寺即此年也別宗一詩

云一身去國六千里萬死投荒十二年自永貞元年至是十二年矣

元和十二年丁酉

有代李愬襄州謝上表復大雲寺記東亭記祭揚詹事文朗州司戶薛君妻崔氏墓誌等郭師墓誌其誌云丁酉之年秋既季即是年九月也

元和十三年戊戌

有平淮夷雅上裴門下啓上襄陽李僕射啓與邕管李中丞啓爲裴中丞乞討黃賊上裴

相狀爲裴中丞伐黃賊轉牒上李夷簡書答杜温夫書萬年令裴府君墓碣襄陽丞趙君墓誌上夷簡書云宗元曩者齒少心銳徑行高步不知道之艱以陷乎大阨窮躓墮廢爲孤囚日號而望十四年矣獻淮夷雅表曰臣負罪竄伏違尚書牋奏十有四年蓋自始貶至今十四年也韓退之羅池碑云侯爲州三年柳民旣皆喜悅嘗與其部將魏忠謝寧歐陽翼飲酒驛亭謂曰吾棄於時而寄於此與若等好也明年吾將死死而爲神後二年

為廟祀我及期而死其與部將飲酒驛亭蓋
此年也

元和十四年己亥

是年李師道伏誅有賀破東平表為裴中丞
賀破東平表賀東平赦表賀分淄青為三道
表禮部賀冊尊號表為裴中丞謝討黃賊表
答鄭真外賀啓答諸州賀啓上中書門下狀
上裴相狀上裴中丞狀訾家洲亭記韋夫人
墳記嶺南鹽鐵李侍御墓誌邕管李中丞墓
誌處士裴君墓誌試大理評事裴君墓誌祕

書郎姜君墓誌按唐史吳武陵傳云初宗元
謫永州而武陵亦坐事流永州宗元賢其人
及為柳州刺史武陵北還大為裴度器遇每
言宗元無子說度曰西原蠻未平柳州與賊
犬牙宜用武人以代宗元使得優游江湖又
遺工部孟簡書曰古稱一世三十年子厚之
斥十二年殆半世矣霆砰電射天怒也不能
終朝聖人在上安有畢世而怒人臣耶且程
劉二韓皆已拔拭或處大州劇職獨子厚與
猿鳥為伍誠恐霧露所嬰則柳氏無後矣度

未及用而宗元死武陵此書蓋在元和十一年又三年而子厚死矣墓誌云子厚以元和十四年十月五日卒年四十七明年七月十日歸葬萬年先人墓側

柳先生年譜終

雖正云西八月小玲
瓌山館依宋本校

吳郡李士芳鐫

柳文年譜後序

昔之論文者或謂文章以氣為主或謂文窮而益工先生與楊憑書亦曰凡爲文以神志爲主又云自貶官來無事讀百家書上下馳騁乃少得知文章利病先生自妙齡秀發連中異科繼登臺省旋遭斥逐故予以先生文集與唐史參考爲時年譜庶可知其出處與夫作文之歲月得以究其辭力之如何也紹興五年六月甲子知柳州軍州事潞國文安禮序

乙卯季夏下旬二十八日閱一過 小蓮

柳集久逸年譜獨存其序廣陵馬君嶰谷沙江
購韓譜後未久復收宋槧柳集殘帙其中年譜
完好乃諸本所無因與韓譜同梓是譜辨柳與
為柳子高伯祖非曾伯祖足訂前賢之疎又陽
城自國子司業出刺道州唐史無年月通鑑攷
異據柳子所作司業遺愛碣謂在貞元十四年
譜則以遺愛碣及與太學諸生書並繫貞元十
五年與通鑑異然諦觀碣文則譜為是也集中

柳譜跋

與太學諸生書題下注貞元十四年乃後人承
通鑑之文而失之當據譜釐正至於譜文甚簡
盖倣呂汲公韓譜體例略具作者出處梗概讀
者更詳考之可也

雍正庚戌春日長洲陳景雲識



